

Служба священномученику Вениамину Петроградскому и иже с ним пострадавшим

24 декабря 2015 г. 22:20

Текст службы священномученику Вениамину Петроградскому и иже с ним пострадавшим
утвержден на заседании Священного Синода 24 декабря 2015 года ([журнал № 114](#)).

Служба священномученику Вениамину Петроградскому и иже с ним пострадавшим.

Месяца иу́лиа в 31-й день

Предпра́зднство происхожде́ния Честна́го и Животворя́щаго Креста́ Господня
и свята́го священномученика Вениа́мина, митрополи́та Петрогра́дскаго, и иже
с ним пострада́вших преподо́бномученика Серге́я и мучеников Ю́рия и
Иоа́нна

На вели́цей вече́рни

На Го́споди, воззва́х: стихи́ры, глас 6:

Измла́да нелéнно поуча́ясь в зако́не Господнем,/ чи́стою любóвию к
Бо́гу возгорéлся еси́/ и мученическаго по́двига желáнием уязви́лся еси́,/
священномучени́че Вениа́мине,/ святи́телю сла́вный Цéркве Ру́сския./ Егда́ же
приведе́ тя Христо́с ко жре́бию о́ному,/ ничесо́же убо́явся, благодарне́ ре́кл
еси́:/ сла́ва Тебе́, Бо́гу на́шему, во ве́ки.

Ви́дя Господь добродéтели тво́я,/ са́ном архиере́йским возвели́чи тя/ и,
во укрепле́ние ве́ры Правосла́вныя,/ во дни гонéния безбо́жнаго на Цéрковь
Ру́сскую/ главо́ю митрополи́и Петрогра́дския поста́ви./ Ты же,
священномучени́че Вениа́мине,/ па́ству твою́ му́дре ко Христу́ путево́дя,/
о́браз ве́ры и терпе́ния всем яви́л еси́/ и испове́дник непоколеби́мый
показа́лся еси́./ Сего́ ради ты с любóвию прославля́ем.

Изра́нный Бо́гом на престóл святи́телей Петрогра́дских,/ не дал еси́
поко́я телеси́ тво́ему,/ но, во вся преде́лы сто́льнаго гра́да сто́пы тво́я
направля́я,/ ни́щия и недужны́я посеща́л еси́/ и ду́хом смире́ния и милосе́рдия
воеди́но па́ству твою́ собира́л еси́,/ священномучени́че Вениа́мине, о́тче наш./
Те́мже мо́лим тя:/ не забуди́ и нас, любóвию ты почита́ющих,/ но милостивно
посети́ ду́ши на́ша.

Глаго́лет Господь во святéм Ева́нгелии:/ не убойте́ся от убива́ющих
тéло,/ души́ же не могу́щих уби́ти./ Сего́ ради и ты, свя́те Вениа́мине,/ сло́ву
Бо́жию послéдуя,/ прещéний вла́сти безбо́жныя не устраши́лся еси́,/ но,
укрепля́емь благода́тию Ду́ха Пресвята́го,/ мучени́ческую кончи́ну
до́блественне прия́л еси́./ И ны́не моли́ся о всех нас,/ да пребу́дем и мы
неколеблеми и твёрди в ве́ре Правосла́вней/ во вся дни живота́ на́шего.

Сла́ва, глас 1:

Бо́гу себе́ преда́вше,/ стезе́ю любве́ в жи́зни сей шéствовасте,/
святи́телю Вениа́мине и преподо́бномучени́че Серге́е,/ вку́пе с духо́вными
ча́ды Ю́рием и Иоа́нном,/ егда́ же бу́ря нечести́я на Цéрковь Ру́сскую

воздвѣжесе,/ вы, прещений и лжесвидѣтельств мучителей не убоявшесе/ и ревностию о Бозе связуеми,/ даже до крове за Христа пострадасте./ Ныне же, божественным светом осияваемы,/ молитесь прилежно Богу/ даровати нам мир и велию милость.

И ныне, Креста, глас тойже:

Днесь яко воистинну/ святовещанный глагол Давидов конец прият:/ се бо яве пречистых ног Твоих поклоняемся подножию/ и, на сень крилу Твоею надеюшесе,/ Всещедрый, вопиём Ти:/ да знаменается на нас свет лица Твоего./ Православных людей Твоих рог вознеси/ честнаго Креста Твоего воздвижением,/ Христэ Многомилостиве.

Вход. Прокимен дне и чтения.

Деяний святых апостол чтение (глава 4):

Во дни оны, глаголющим апостолом к людем,/ наидоша на них священники и воевода церковный, и саддукей,/ жалеюще си, за еже учити им люди и возвещати о Иисусе воскресение мертвых;/ и возложиша на них руки и положиша их в соблюдение до утрия:/ бе бо вечер уже./ Мнози же от слышавших слово вероваша:/ и бысть число мужей яко тысящ пять./ Бысть же наутрие собратися князем их, и старцем, и книжником во Иерусалим:/ и Анне архиерею, и Каиафе, и Иоанну, и Александру,/ и елицы беша от рода архиерейска./ И, поставльше их посреде, вопрошаху:/ кою силою, или коим именем сотвористе сие вы?/ Тогда Петр, исполнивсѣ Духа Свята, рече к ним:/ князи людстии и старцы Израилевы,/ аще мы днесь истязуеми есмы о благодеянии человека немощна,/ о чем сей спасесе,/ разумно буди всем вам и всем людем Израилевым,/ яко во имя Иисуса Христа Назорея,/ Егоже вы распясте,/ Егоже Бог воскреси от мертвых,/ о сем сей стоит пред вами здрав./ Сей есть камень, укоренный от вас, зждущих,/ бывый во главу угла,/ и несть ни о едином же ином спасения;/ несть бо иного имени под небесем, даннаго в человецех,/ о немже подобает спастися нам.

Деяний святых апостол чтение (глава 4):

Во дни оны, видяще иудеи Петрово дерзновение и Иоанново и разумевше,/ яко человека не книжна еста и проста, дивляхуся,/ знаху же их, яко со Иисусом беша;/ видяще же исцеленнаго человека с ними стояща,/ ничтоже имяху противу рещи./ Повелевше же има вон из сонмища изйти,/ стязахуся ко друг другу, глаголюще:/ что сотворим человека сима?/ Яко убо нарочитое знамение бысть има,/ всем живущим во Иерусалиме яве,/ и не можем отрещися;/ но да не более прострется в людех,/ прещением да запретим има ктому не глаголати о имени сем ни единому от человек./ И призвавше их,/ заповедаша има отнюдь не провещавати, ниже учити о имени Иисусове./ Петр же и Иоанн, отвещавше к ним, реста:/ аще праведно есть пред Богом/ вас послушати паче, нежели Бога?/ Судите: не можем бо мы, яже видехом и слышахом, не глаголати./ Он же, призапрещше има, пустиша я,/ ничтоже обреще, како мучити их, людем ради,/ яко вси прославляху Бога о бывшем:/ лет бо быше множае четыредесяти человек той,/ на немже бысть чудо сие исцеления.

Деяний святых апостол чтение (глава 6-7):

Во дни оны, Стефан исполнь веры и силы творяше знамения и чудеса велия в людех. Воста же нецыи от сонма глаголемаго Ливертинска и

Киринейска и Александрска, и иже от Киликии и Асии, стязующеся со Стефаном. И не можаху противу стати премудрости и Духу, Иже глаголаше. Тогда подустыша мужы глаголющия, яко слышахом его глаголюща глаголы хульные на Моисеа и на Бога. Сподвигоша же люди и старцы и книжники, и нападше восхитиша его и приведоша на сонмище, поставиша же свидетели ложны глаголющия, яко человек сей не prestaет глаголы хульные глаголя на место святое сие и закон. Слышахом бо его глаголюща, яко Иисус Назорей сей разорит место сие и изменит обычаи, яже предаде нам Моисей. И возревше нань вси седящи в сонмищи, видеша лице его яко лице Ангела. Рече же архиерей: аще убо сия тако суть? Он же рече: мужие братие и отцы, послушайте. Бог славы явися отцу нашему Аврааму сущу в Месопотамии, прежде даже не вселитися ему в Харрань, и рече к нему: изыди от земли твоея и от рода твоего и от дому отца твоего, и прииди в землю, юже аще ти покажу. Тогда изшед от земли Халдейския, вселися в Харрань, и оттуду, по умертвии отца его, пресели его в землю сию, на нейже вы ныне живете, и не даде ему наследия в ней, ниже стопы ногу. Соломон же созда Ему храм. Но Вышний не в рукотворенных церквах живет, якоже пророк глаголет: Небо Мне престол есть, земля же подножие ногам Моима. Кий храм созиждете Ми, глаголет Господь, или кое место покоишу Моему? Не рука ли Моя сотвори сия вся? Жестоковийнии и необрезанныи сердца и ушесы, вы присно Духу Святому противитесь, якоже отцы ваши, тако и вы. Кого от пророк не изгнаша отцы ваши? И убиша предвозвестившыя о пришествии Праведнаго, Егоже вы ныне предатели и убийцы бысте, иже приясте закон устройением Ангельским и не сохраните. Слышаще же сия, распыхахуся сердца своими и скрежетаху зубы нань. Стефан же сый исполнь Духа Свята, возрев на небо, виде славу Божию и Иисуса стояща одесную Бога, и рече: се вижу небеса отверста и Сына Человеча одесную стояща Бога. Возопивше же гласом велиим, затыкаху уши свои и устремившася единодушно нань, и изведше вне града, камением побиваху его, и свидетелие снемше ризы своя положиша при ногу юноши нарицаемаго Савла, и камением побиваху Стефана, молящася и глаголюща: Господи Иисусе приими дух мой. Преклонь же колена, возопи гласом велиим: Господи, не постави им греха сего. И сия рек успе.

На литии стихира храма и святым, глас 1:

Крестá всечестнаго непоборимая сила/ укрепляше вас в подвизе вашем,/ святителю Вениамине и преподобномучениче Сергие,/ мученицы святии Юрие и Иоанне, бысте бо избранни, яко вернии раби Христови,/ славнии исповедницы четверочисленнии,/ во образ четвероконечнаго Крестá Господня,/ освящающаго концы вселенныя.

Мученицы четверочисленнии, неповинно убиеннии,/ блажен град, иже прият телеса ваша,/ и земля, яже напоена вашими кровьюми,/ вы бо, Христа всем сердцем возлюбивше,/ даже до смерти верни Тому пребыли есте./ Ныне же, с лики новомучеников и исповедников Церкви Русския/ Престолу Пресвятыя Троицы предстояще,/ молитвы ваши Богу вознесите,/ да сохранит град и страну нашу в мире и единомыслии/ и избавит ны от прещения Своего праведнаго.

Слава, глас тойже:

Егда мучители безбожнии смерти вас предаваху,/ ты, святителю Вениамине,/ крестным знаменем себе ограждал еси/ и молитву благодарения Богу возносил еси./ Ты же, преподобномучениче Сергие,/ о вразех твоих молитвенно въздыхая, вопиял еси:/ прости им, Бóже, не вѣдят бо, что творят./ Купно с ними и вы, мученицы Иоанне и Юрие,/ страх смерти презревше,/ ко страданию мужественно потекли есте/. Ныне же, святии, во славе Небесней пребывающе,/ с лики ангельскими Святую Троицу прославляете.

И ныне, Богородичен, глас тойже:

Се исполнися Исаиино проречѣние:/ Дѣва бо родила еси/ и по рождествѣ, яко прежде рождества, пребыла еси,/ Бог бо бе Рождѣйся, тѣмже и естества новопресече./ Но, о Богомати,/ молѣния Твоих рабов,/ в Твоем храме приносима Тебѣ, не презри,/ но яко Благоутробнаго Твоима рукама носящи,/ на Твоя рабы умилосердися/ и моли спастися душам нашим.

На стиховне стихиры, глас 2.

Подобен: Егда от Древа:

Егда лжепастырие лукавии/ власть церковную восхитити и стадо словесное расточити восхотѣша,/ тогда в бѣгство не обратился еси,/ архиерею доблестный Вениамине,/ и кормило корабля церковнаго,/ еже вручи тебе Господь, а не человек,/ в руке чуждых не предал еси,/ но пастырь добрый показался еси,/ полагая душу твою за овцы твоя.

Стих: Священницы Твои облекутся в правду/ и преподобнии Твой возрадуются.

Егда отступники, предания церковная отвергающия/ и новыя обычаи вводящия,/ от Церкви Святыя отлучил еси,/ тогда ты, святителю Вениамине,/ теми в руке безбожных предан был еси,/ иже на смерть ты неправедно осудиша./ Сего ради мученическим венцем украсился еси/ и Небесная сокровища обрел еси,/ светлая красота града нашего.

Стих: Честна пред Господем/ смерть преподобных Его.

Егда безбожнии мучители/ прещении лъстивыми тя устрашаху/ и воли своей покорити тщахуся,/ тогда, иерарше предивне,/ ревностию по Бозе распалаемь,/ в броню правды облеклся еси/ и, твердость веры непоколебимо являя,/ мученическую смерть приял еси,/ верным людям образ терпения показуя.

Слава, глас тойже:

Ведому ти на судище беззаконное,/ вси вернии на стогнах Петрова града/ сретяху тя, страстотерпче святой Вениамине,/ и, во умилении сердечном колена своя преклоняюще,/ со слезами воспеваху песнь церковную:/ спаси, Господи, люди Твоя.

И ныне, глас тойже:

Ты ми покров державен еси,/ тричастный Кресте Христов:/ освяти мя силою твоею,/ яко да верою и любовью поклоняюся и славлю тя.

На благословении хлебов тропарь святого дважды, глас 1:

Светильник всесветлый во граде святого Петра явился еси,/ пастырю добрый, священномучениче отче Вениамине./ Любовь и милосердие в сердцах верных насаждая,/ благотворити призывал еси терпящим глад и нищету./ Сего ради и мы к тебе прибегаем/ и с верою вопием ти:/ моли

Милостиваго Бóга,/ отечество наше в Православии и благочестии утвердѣти,/ мир Церкви даровати/ и душам нашим велию милость.

И тропарь Крестá, глас 1:

Спаси, Господи, люди Твоя,/ и благослови достояние Твое,/ победы православным христианом на сопротивныя даруя,/ и Твое сохраняя Крестом Твоим жительство.

На ўтрени

На Бог Господь: тропарь Крестá двáжды. Слáва, тропарь святаго. И ныне, тропарь Крестá.

По 1-м стихословии седáлен, глас 3:

Посрамил еси, святе Вениамине, лжеучители нечестивыя,/ слово евангельское искажившия и разделение в Церкви произведшия./ Тщётно бо тии словесы лстивыми склоняху ты от истины Христовой отступить/ и паству, юже ти Бог вручи, оставити./ Ты же, святителю, десницею Бóжиею укрепляемь,/ тверд и непреклонен до конца пребыл еси.

Слáва, и ныне, Богородичен:

Пресвятáя Дéво, Отроковице Препоблагословенная,/ блаженна еси, Христá Бóга рóдши,/ темже облаженствуй Того воли повинующияся.

По 2-м стихословии седáлен, глас 8:

Аще и торжествоваху беззаконнии,/ иже искаша погибели твоея, архипастырю и мучениче достославне,/ но привременне и память их погйбе с шумом./ Твое же имя, яко Истины побóрника, сияет на Небесех/ и слава твоя во вéки пребывает неизмéнна.

Слáва, и ныне, Богородичен:

Пречистая Богородице, Спáса Христá неизреченно рождающая/ Егоже моли со священномучеником Вениамином и всеми святыми,/ во éже просветити и спасти род наш.

Величáние:

Величаем вас,/ святии новомученицы Вениамине, Сергие, Юрие и Иоанне,/ и чтим честная страдания ваша,/ яже за Христá/ претерпели есте.

Псалом избранный:

Бог нам Прибежище и Сила.

Господи, воздвигни силу Твою и прииди, во éже спасти ны.

Глаголах о свидениях Твоих пред царя и не стыдяхся.

Вси языцы обыдоша мя, и именем Господним противляхся им.

Тебе ради умерщвляемся весь день, вменихомся яко овцы заколения.

Крепость моя и пение мое Господь и бысть мне во спасение.

По полиелее седáлен, глас 1:

Испыта ты Господь, святителю славне, и обрете верна Себе/ и, яко злато в печи страданий, очисти, яко волну, убели ты./ Ты же, прошед сквозе огнь и воду,/ обрел еси вечный покой, о камению драгий, украшение Церкви нашей.

Слáва, и ныне, Богородичен:

Честнейши явилася еси Херувим,/ на земли рóдшая Христá, всех Владыку,/ Чистая Всенепорочная Владычице.

Степéнна, 1-й антифóн 4-го глása. Прокимен, глас 4: Пройдохом сквозе огонь и воду,/ и извел еси ны в покой. Стих: Разжегл ны еси, якоже разжизается сребро. Всякое дыхáние: Евангелие от Матфея, зачало 36.

По 50-м псалмѣ стихира, глас 6:

Небеса́ возвесели́шася во страдании вашем,/ святителю Вениамине и преподобномучениче Сѣргие,/ мученицы Иоанне и Юрие,/ воины честнии Христа́ Бѣга нашего четверочисленнии./ Ныне, во Царствии Небеснем неразлучны пребывающе,/ молитесь ко Господу/ о умирении и спасении душ наших.

Канон святых, глас 8.

Песнь 1

Ирмос: *Воду прошед, яко сушу,/ и египетскаго зла избежав,/ израильтянин вопияше:/ Избавителю и Богу нашему поим.*

Припев: Священномучениче Вениамине, моли́ Бѣга о нас.

От юности Христа́ всем сердцем возлюбив,/ шествовати ангельским путем изволил еси,/ в молитвах же неустанных пребывая,/ жертву духовную Бѣгови принесл еси, святителю Вениамине.

Якоже отец чадолюбивый явился еси многим:/ нищим и сирым, страннным и убогим, грехми обремененным и в бедах и болезнях сущим,/ сокрушения и раны их исцеляя,/ Вениамине сострадательне и преславне.

Простирал еси десницу помощи одержимым недугом пьянства,/ воздержание тем проповедуя и жизнь во Христе тех устроая,/ наипаче же образ кротости и милосердия являя, Вениамине всехвальне.

Богородичен: Обрет Тя, Всечистая, честнейшую всея твари,/ воплотитися из Тебе благоволи Зиждитель и Бог всех,/ падшаго Адама восставить промисливый.

Песнь 3

Ирмос: *Небесного круга Верхотворче, Господи,/ и Церкви Зиждителю,/ Ты мене утверди в любви Твоей,/ желаний краю, верных утверждение,/ Едине Человеколюбче.*

Словом евангельским паству твою неленостно наставляя, святителю Вениамине,/ душу твою за люди по вся дни полагал еси./ Сего ради Богом прославлен бысть,/ яко достойный архиерей града святого Петра.

Любве ради к Богу вольней нищете покорился еси, архипастырю Петроградский,/ темже во дни испытаний лютых Христос дарова ти благодать не токмо веровати в Него,/ но и за Него пострадати.

О службах Божиих тцание являя,/ в молитвах и бдениих с паствою присно пребывал еси,/ храмы же Господни от поругания защищая,/ православная братства устроая еси, Вениамине преславне.

Богородичен: Чистоты и девства Сосуде избранный/ и Сына Божия честное Селение,/ Пренепорочную Владычицу, приидите, вернии, песнями достойно почтим.

Седален, глас 4:

Не поставляют свещу зажженную под спудом,/ но на свещнице, рече Господь./ Тако просветишася светом добродетелей твоих, отче Вениамине,/ людие Церкви Русския,/ совершающия днесь преславно святую память твою.

Слава, и ныне, Креста, глас тойже.

Подобен: Вознесыйся:

Светло небо показуется паче солнца светом Крестным/ просвещает всяческая зарю своюю./ Темже Ты, Человеколюбче, Спасе всяческих,/

просвети́ ум наш егѡ ра́ди и чу́вства:/ мы бо има́мы тогѡ ору́жие ми́ру, непобеди́мую побѣду.

Песнь 4

Ирмо́с: Ты моя Крепость, Господи,/ Ты моя и сила,/ Ты мой Бог, Ты мое радование,/ не оставь недра Отца/ и нашу нищету посетив./ Тем с пророком Аввакумом зову Ти:/ силе Твоей слава, Человеколюбче.

Гонимыя и мучимыя небоязненно укреплял еси,/ гонители же с мучители кротко вразумлял еси,/ прещений тех не страшась, святителю Христов Вениамине,/ тверд пребывая посреде всех навет вражиих.

Стезю правды Христовой неуклонно шествовал еси/ и паству твою, богомудре Вениамине, на путь спасения направлял еси, глаголя:/ подобает душу свою полагати за Христа даже до смерти.

Не возмогоша нечестивии крепость души твоя одолети/ и твердость исповедания твоего победити, священномучениче досточудне,/ ты бо, в сердце своем победное Креста знамение нося,/ веру Христову дерзновенно утверждал еси.

Богородичен: О, Дево Неискусобрачная!/ Ты в рождестве Девою пребыла еси/ и по рождестве Приснодевою явилася еси./ Тем немолчными гласы Тя, Владычице, величаем.

Песнь 5

Ирмо́с: Просвети нас повелении Твоими, Господи,/ и мышцею Твоею высокою/ Твой мир подаждь нам,/ Человеколюбче.

Щедраго даятеля любит Господь,/ вопиял еси в сердце твоём, святителю нищелюбче,/ темже, непрестанное попечение о страждущих имея,/ верных милостыню неоскудно подавати научал еси.

Любовию ко алчущим болезнуя,/ молитву теплую ко Пречистой Богородице принесл еси/ и ризу от честнаго образа Ея,/ яко жертву добровольную, нуждающимся подал еси.

Егда прииде время смуты лютыя и востания безбожных,/ люди от кровопролития премудре удержал еси./ Нечестивии же оболгаху тя, исповедниче Христов,/ злом за добро тебе воздавая.

Богородичен: О, Мати Божия, рождающая Всеблагое Слово!/ Души моей озлобление исцели/ и на путь покаяния направи.

Песнь 6

Ирмо́с: Молитву пролию ко Господу/ и Тому возведу печали моя,/ яко зол душа моя исполнися/ и живот мой аду приблизися,/ и молюся, яко Иона:/ от тли, Боже, возведи мя.

Егда отступницы нечестивии,/ предания церковная отвергающия и нововведения лъстивно вводящия, ополчишася на тя,/ тогда ты, богомудре Вениамине, неложно учил еси,/ како подобает в дому Божиим жити,/ яже есть Церковь Бога Жива, столп и утверждение Истины.

Егда отступницы от веры лжами и клеветами оболгаху тя/ и в рuce грешников предаша,/ ты, святителю, яко истинный раб Христов, в вере пребывая, кротце рекл еси:/ радостне ми есть Христа ради вся терпети от своих и чуждых.

Пред мучители на судищи предстоя,/ о правде Божией свидетельствовал еси, святителю, глаголя:/ не вем, яко возвестите ми,/ еже

жѣти или умрети./ Обаче очи свои горѣ возведѹ и рекѹ:/ за вся, Господи, слава Тебѣ.

Богородичен: Глас архангела Гавриїла, Дѣво Всенепорочная, ныне Тебе приносим:/ радуйся, Благодатная, Господь с Тобою.

Кондак, глас 6:

От юности крест Христов на рамо взем,/ истинный страж Православныя Церкви явился еси,/ священномучениче Вениамине./ Клевету, узы, оплевания, и суд неправедный/ от беззаконных мужественно претерпевая,/ святину церковную на поругание не предал еси./ Темже и Христос даром терпения и любви ты исполни,/ во еже пред мученическою кончиною/ со благодарением взывати:/ за вся, Господи, слава Тебѣ.

Икос:

Яви ты Господь, святителю отче Вениамине,/ украшение граду нашему велие,/ дивнаго представителя о людех твоих,/ истиннаго свидетеля правды Божия,/ наставника заблуждшим,/ любви и кротости правило,/ светильника во тьме греховней сияюща,/ мученика дерзновеннаго,/ исповедника твердаго,/ столпа неколебимаго Церкви нашея,/ и вернаго служителя Своего, рекшаго:/ за вся, Господи, слава Тебѣ.

Песнь 7

Ирмос: *От Иудеи дошедше отроцы/ в Вавилоне иногда,/ верою Тройческою пламень пещный попраша, поюще:/ отцев Боже, благословен еси.*

От юности подвигом святых страстотерпцев приобщитися желая,/ чашу страданий испил еси, святителю Вениамине./ Темже увенча ты Господь венцем мученическим, взывающа:/ благословен еси, Господи, Боже, во веки.

Борением внутренним в темнице томимь,/ воли Божией всецело предался еси, мучениче добropобедный,/ и, покоем Небесным исполнився, яко отроцы в пещи Вавилонстей воспевал еси:/ благословен еси, Господи, Боже, во веки.

Во узилищи сый,/ чашу страданий, предуготованную тебе, до конца испил еси, мучениче преславне,/ и, велиих утешений и радости неизреченныя от Духа Святаго удостоився,/ добropобедне взывал еси:/ благословен еси, Господи, Боже, во веки.

Богородичен: Вышшая Небесных сил, Единая от веков Ты явилася еси, Богородительнице,/ Зиждителя бо и Творца всяческих родила еси неказанно,/ Всечистая Владычице.

Песнь 8

Ирмос: *Царя Небеснаго,/ Егоже поют вси Ангельстии/ хвалите и превозносите во вся веки.*

Пастырей Церкви Христовой назидал еси, мудре архиерею,/ да все упование на Бога возложат и верою неколеблемою вооружатся,/ Спаситель бо наш сохранит Церковь Свою нерушиму до скончания века.

Христос наша Жизнь, Свет и Покой,/ с Нимже и в темнице добро есть быти,/ сице наставлял еси паству твою, святителю Вениамине,/ и предуготовлял еси ю к страданием, взывая:/ Господа пойте и превозносите во вся веки.

Не аз спасаю Церковь, но Ею сам спасаюся,/ тако смиренно помышлял

есї, священномучениче Вениамїне./ Сего ради нимало страшїлся есї о судьбѣ Невѣсты Христовы, взывая./ Гóспода пойте и превозносите во вся веки.

Богородичен: Жезл из корене Иессеева, Дѣво, была есї./ Цвет возрастївши, Христа Жизнодавца./ благодать всем подающаго, взывающим./ благословите, вся дела Господня, Гóспода.

Песнь 9

Ирмос: Воистинну Богородицу./ Тя исповедуем./ спасенни Тобою, Дево Чистая./ с Безплотными лики Тя величающе.

Не посрамим веры Православныя и упования нашего./ яже есть надежда благ вечных./ сими словесы в гонениях укреплял есї паству твою, святителю Вениамїне./ исполняя служение свое даже до смерти.

Мужественне смерть прияти уготовляясь./ сострадальцы твоя укреплял еси/ и, вся благодарне претерпевая./ мучители твоя благословил еси, Вениамїне терпеливодушне.

Исполнися слово апостольское во страдании вашем, мученицы четверочисленнии./ яко ни скорбь, ни гонения, ни настоящая, ни грядущая/ не возмогут верныя отлучити от любви Божия./ Сего ради вас убожаем.

Богородичен: Тя, неискусомужно рождшую Жизнодавца и Спаса./ Богородицу воистину исповедуем и молим прилежно./ избави нас от всякия скорби и болезни молитвами Твоими, Мати Дѣво.

Светїлен:

В мире скорбни будете./ но дерзайте, яко Аз победих мир, глагола Господь учеником Своим./ Сей завет Христов добре хранил есї, архиерею праведный./ и победно восшел есї во светлыя чертоги Царства Небеснаго.

Слава, и ныне, Крестá:

Крест предпразднуется и мир освящается./ чїни ангельстии поют нас ради Распѣшагося./ и торжествуют с нами и срадуются, Давїдски зовуще./ содела спасение посреде земли, Владыко.

На хвалїтех стихїры, глас 8:

Священномучениче Вениамине, Церкви Христовы истинный сыне/ и благостояния Ея усердный ревнителю./ противу лжепастырей, тшавшихся расхитити стадо твое./ мужественне стал еси/ и, не убоаяся прещений и лжесвидетельств мучителей./ обратил еси суд на главу судивших тя./ таже смертью твоею Православие утвердил еси./ Сего ради ты усердно убожаем.

Ни словес плетением./ ни мудростию человеческою./ но паче простотою и правдою/ проповедь твоя, иерарше досточудне, исполнена бысть./ глубины сердечныя достигающи/ и веру правую в людех укрепляющи./ Сего ради, яко истиннаго пастыря./ вси ты с любовию почитаем.

Духом евангельския любви пламенея/ и о пастве твоей болѣзнуя./ жилища страждущих и убогих посещал есї/ и, многих на путь истины наставляя./ во ограду церковную приводил еси./ Темже ты, святителю отче Вениамине./ яко пастыря добраго и наставника верна ведуще./ с любовию благочестно почитаем.

Клевету от человек беззаконных./ суд неправедный и предательство лжебратий./ мужественне претерпел есї./ священномучениче Вениамїне./

таже и смерть за Христа приял еси/ и жрѣбья высѣкаго удостоился еси./ Сего ради с любовью почитаем тя/ и совершаем всечестную память твою.

Слава, глас 6:

Приидите, вернии, составим лик,/ торжествуяще и Бога прославляюще/ в память новомучеников четверочисленных:/ Вениамина святителя и Сергия преподобномученика,/ вкупе с мученики добропобедными Юрием и Иоанном,/ сии бо, Церковь Христову защищающе,/ не уклонишася скорби,/ ни убояшася темницы/ и, яко агнцы незлобивии, смерть прияша./ Ныне же в радости святых предстоят/ и молят Троицаго Бога/ о земнем отечестве нашем.

И ныне, Крестá, глас тойже:

Пророчестии гласи Древо святое провозвестиша,/ имже древняя клятвы смертныя свободися Адам,/ тварь же днесь возносиму тому созовышает глас,/ яже от Бога просящи богатыя милости./ Но единый в благоутробию, Безмерный Владыко,/ очищение буди нам/ и спаси души наша.

На Литургии

Блаженны от канона песни 3-я и 6-я. Прокимен, глас 7: Честна пред Господем/ смерть преподобных Его. Стих: Что воздам Господеву о всех, яже воздаде ми? Апостол к Римляном, зачало 99. Аллилуиа, глас 6: Священницы Твои облечутся в правду,/ и преподобнии Твои возрадуются. Стих: Бог нам Прибежище и Сила, Помощник в скорбех, обрѣтших ны зело. Евангелие от Луки, зачало 106. Причастен: В память вечную будет праведник:

Молитва

О, избранный угодниче Христов, священномучениче Вениамине, Церкви Русския столпе непоколебимый, земли нашея благое прозябение и красный плод, паствы твоея представителю и наставниче! Ты во время гонения безбожнаго от сокровищницы души твоея спасительное исповедание Православныя веры изнесл еси, и верным людем града святого Петра пастырь добрый явился еси, душу твою за Христа и Его овцы полагая и лютыя волки далече отгоняя, сострадание являя и братолюбие утверждая. В сердце же свое Христа восприем, посреде бурь житейских сердечную молитву и мир душевный хранил еси. Ныне убо призри на нас, недостойных чад твоих, умиленною душею и сокрушенным сердцем тя призывающих. Утверди нас в вере святей, научи ны всегда творити волю Божию и хранити заповеди церковныя. Буди пастырем нашим правило веры, воином вождь духовный, недужным врач изрядный, печальным утешитель, гонимым заступник, юным наставник, всем же благосердый отец и теплый молитвенник, яко да молитвами твоими соблюдется в Православии Отечество наше и град твой, и непрестанно славится в них имя Пресвятыя Троицы, Отца и Сына и Святого Духа во веки веков. Аминь.